

Na osnovu Programa obilježavanja Dječije nedjelje na području Unsko-sanskog kantona za 2025. godinu, člana 30. stav (3) Zakona o izvršavanju Budžeta USK ("Službeni glasnik Unsko-sanskog kantona", br. 1/25) i člana 32. i 35. Zakona o materijalnoj podršci porodicama sa djecom u Federaciji Bosne i Hercegovine ("Službene novine Federacije BiH", br. 52/22 i 58/24), ministar Ministarstva zdravstva, rada i socijalne politike objavljuje:

**Javni poziv za dodjelu sredstava sa pozicije grantovi drugim nivoima vlasti iz budžeta Unsko-sanskog kantona za 2025. godinu – Dječija nedjelja za finansiranje podrške mladima koji izlaze iz sistema javne brige kao pomoći u njihovom osamostaljenju**

**I Predmet javnog poziva:**

Predmet javnog poziva je dodjela sredstava iz Budžeta Unsko-sanskog kantona za 2025. godinu, prikupljenih povodom obilježavanja Dječije nedjelje tokom 2024. godine i akumuliranih do 30.9.2025. godine u visini od 15.044,64 KM, za finansiranje podrške mladima koji tokom 2025 godine izlaze iz sistema javne brige kao pomoći u njihovom osamostaljenju, posredstvom nadležnih Centara za socijalni rad.

**II Pravo učešća**

Pravo učešća po ovom Javnom pozivu ima Centar za socijalni rad sa područja Unsko-sanskog kantona u čijoj nadležnosti je mlada osoba koja tokom 2025 godine izlazi iz sistema javne brige (okončanje boravka u ustanovi socijalne zaštite ili kod hranitelja), a posredstvom kojeg će sredstva iz Budžeta biti dodijeljena mladoj osobi kao krajnjem korisniku sredstava u svrhu finansijske pomoći u njenom osamostaljenju.

**III Namjena finansijske podrške**

Namjena materijalne podrške mladima koji su izašli iz sistema javne brige može biti:

- a) Stambeno zbrinjavanje – plaćanja troškova iznajmljivanja stambenog prostora ili opremanja istog/vlastitog stambenog prostora;
- b) Stjecanje novih vještina kojima bi se unaprijedila konkurentnost na tržištu rada – prekvalifikacija, dokvalifikacija, polaganje vozačkog ispita.

**IV Kriteriji za učešće i raspodjelu sredstava**

Kriteriji za učešće i raspodjelu sredstava koji će se cijiniti su:

- a) da je mlada osoba u prethodnom periodu kao dijete bez roditeljskog staranja, sa prebivalištem na području Unsko-sanskog kantona, posredstvom nadležnog Centra za socijalni bila smještena u odgovarajući oblik brige koji je okončan – u ustanovi socijalne zaštite ili kod hranitelja – jedan bod;
- b) da će mlada osoba tokom 2025. godine napuniti 18 godina, odnosno postati punoljetna – dva boda;
- c) dostupnost finansijskih sredstava mladoj osobi za podršku u osamostaljivanju iz drugih izvora – maksimalno pet bodova, obrnuto proporcionalno količini sredstava iz drugih izvora.

**V Dokumentacija**

Dokumentacija koja se treba dostaviti prilikom prijavljivanja za finansiranje podrške osamostaljivanju mladih osoba koje napuštaju sistem javne brige:



- a) Popunjen prijavni obrazac za finansiranje podrške osamostaljivanju mladih osoba koje napuštaju sistem javne brige, koji sadrži: podatke o podnosiocu zahtjeva, ime i prezime i datum rođenja mlade osobe koja u tekućoj godini napušta sistem javne brige, te podatak da li postoji dodatni izvor finansijske podrške mladoj osobi u osamostaljivanju koji će joj biti na raspolaganju prilikom napuštanja sistema javne brige;
- b) Rješenje centra o prestanku brige prema mladoj osobi;
- c) Socio-anamnestički podaci sa posebnim osvrtom na trenutno stanje i potrebe mlade osobe, od strane nadležnog centra za socijalni rad.

Dokumenti koji se podnose kao dokaz o ispunjavanju kriterija iz ovog poziva se trebaju predati u originalu i kopiji. Kompletna dokumentacija treba biti poredana po naprijed navedenom redoslijedu.

Centri za socijalni rad kojima sredstva budu odobrena po ovom Javnom pozivu će sa Ministarstvom potpisati ugovor o međusobnim pravima i obavezama, te će centri zaključiti i ugovor o namjenskoj realizaciji sredstava sa mladom osobom koja bude odabrana.

## VI Podnošenje prijava

Prijavni obrazac za finansiranje podrške osamostaljivanju mladih osoba koje napuštaju sistem javne brige iz Budžeta USK (Obrazac 1) se nalazi na web stranici Vlade Unsko-sanskog kantona, zajedno sa javnim pozivom ili se može preuzeti u prostorijama Ministarstva.

Prijave sa potrebnom dokumentacijom dostaviti u zatvorenoj koverti Ministarstvu zdravstva, rada i socijalne politike putem Pisarnice Vlade Unsko-sanskog kantona ili poštom na adresu Ministarstva, sa naznakom „Prijava na Javni poziv za dodjelu sredstava sa pozicije Grantovi drugim nivoima vlasti iz budžeta Unsko-sanskog kantona za 2025. godinu – Dječija nedjelja, za finansiranje podrške osamostaljivanju mladih osoba koje napuštaju sistem javne brige iz Budžeta Unsko-sanskog kantona za 2025 godinu - ne otvaraj“.

Rok za podnošenje prijava po ovom Javnom pozivu je 8 dana od dana objavljivanja na web stranici Vlade Unsko-sanskog kantona i oglasnoj tabli Ministarstva zdravstva, rada i socijalne politike.

Visinu sredstava za raspodjelu po ovom Javnom pozivu utvrđuje resorno ministarstvo na osnovu odobrenog Budžeta USK za 2025. godinu, te zaprimljenih zahtjeva.

Nepotpune i neblagovremene prijave neće se uzimati u razmatranje.

